

Powšitkowne WOZJEWJENJA

njedźelu, 17. septembra 2017

Duchowna hudźba z tachantskim chórom

W Budyskej tachantskej cyrkwi zaklinči njedźelu, 17. septembra, we 18 hodź., lětuši chórowy koncert Katolskeho tachantskeho chóra. Lětsa budže na nim woprawdźita parlička cyrkwinskeje hudźby słyšeć – „Magnifikat“ Johna Ruttera za sopranowe solo, chór a orchester. Tuta kompozicija zjednoća překrasne melodije z modernymi zwukami a rytmy. Jana Pawoła Nagelowa twórba „Strowa sy, Marija“ a saksofonowy koncert Denisa Bédarda program wudospołnitej.

Sopranistka Romy Petrick, saksofonist Tobias Witke a Katolski tachantski chór swjateho Pětra přewodźuje Serbski komorny orchester, cyłkowny nawod ma cyrkwiskohudźbny direktor Friedemann Böhme. Zastup je darmotny.

Patronatna a dźakna Boža mša

Wutrobnje přeprašamy wěriwych na dźaknu Božu mšu pónđzelu, 18. septembra, w 10.00 hodź. do Chróšćanskeje cyrkwyje. Wobydlerjo a sobudźělaćerjo Domu swjateje Ludmile spominaja lětsa dźakowni na wotewrjenje domu we Swinarni před 40 lětami a přecha do noweho domu w Chróšćicach před 15 lětami. Božu mšu změje starobiskop Joachim Reinelt w koncelebraciji z dalšimi duchownymi.

Wendelin Brězan

155 hubkow a 398 postrowow

Ilse Weber – „...sćelu Ći 155 hubkow a 398 postrowow“ rěka tema přichodneho zarjadowanja džěłoweho kruha „Zetkanje ze židowstwom“ pónđzelu, 18. septembra, w 19.30 hodź. w Smochčanskim Domje biskopa Bena. Na přednošku z referentomaj dr. Peter-Paulom Straubu a fararjom dr. Siegfriedom Foelzom ze Smochćic předstaja so tež sluchowe přikłady.

Do skawtskeho žiwjenja počuchać

Za džěci wot 8 lět a młodostnych kaž tež swójby změjemy přichodnu sobotu, 23. septembra, wot 15 hač do 23 hodź. na Kukowskim hrodźišću najwšelakorišu zabawu přihotowanu, při kotrejž móža so jako skawća wuspytać a tróšku wjace wo nich zhonić. Hač chcedža sej džěci něšto spaslić abo so radšo porjadnje wucychnować, za kóžde budže něšto pódla. Přetož najwažniše za skawtow je zhromadnosć a wjeselo. Wječor njebudže wězo lěhwowy woheń pobrachować, při kotrymž tón abo tamny serbski spěw zaspěwamy. Tuž dajće so překwapić a hač do bórže! Zarjadowanje přewjedžemy w kooperaciji z dekanatnym kružkom młodžiny. Inicijatiwa „Partnerschaften für Demokratie“ Budyskeho wokrjesa je spěchuje.

Serbscy skawća „Alojs Andricki“

Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprašuje tež lětsa na wosebity nyšpor domchowanki z požohnowanjom konjacych zapřahow, ke kotremuž přijědže tež Drježdžansko-Mišnjanski biskop Heinrich Timmerevers. Nyšpor budže njedźelu, 24. septembra, w 14 hodź. w Chróšćicach na łuce při Hatkach. Wosadni dujerjo jón wuhotuja.

Jězba do Naumburga

Dekanatne dušepastyrstwo přeprašuje džěci 5. a 6. lětnika wot pónđzele do štwórtka, 9. do 12. oktobra, na jězbu do Naumburga. Wot kóždeho wobdžělnika zběra so přinošk we wysokosći 75 eurow. Zajimcy njech so hač do štwórtka, 28. septembra, we Worklecach pod telefonowym čisłom (03 57 96) 8 87 07 přizjewja.

Chceš pomhać w Naumburgu?

Wot pónđzele do štwórtka, 9. do 12. oktobra – potajkim w prózdninach – přewjedžemy z džěćimi 5. a 6. lětnika jězbu do Naumburga. K tomu pytamoj hišće dweju pomocnikow, kotraž džěci na tutech dnjach sobu přewodžetaj. Jeju nadawk je mjez druhim: pomoc při kreatiwnych poskitkach, wobjedže a dalšich akcijach.

Štóž ma potajkim chwile a lóšt, njech so prošu hač do pjatka, 22. septembra, we Worklecach pod telefonowym čisłom (03 57 96) 9 55 95 abo přez facebookowu stronu dekanatneho dušepastyrstwa přizjewi. *Lubje strowitaj farar Gabriš Nawka a Lucija*

W Kulowje budže Gospelowy workshop

Wšitcy, kotřiž rady spěwaja a kotrychž gospele zahorja, su pjatk a sobotu, 27. a 28. oktobra, do stareho dwórnišća w Kulowje přeprašeni. Cyrkwinskaj hudźbnikaj Carmen a Friedemann Wutzler z Weinböhly chcetaj tež druhich ze swojej zahoritósću za gospelowu hudźbu natyknýc a někotre twórby nazwučować. Tute twórby maja sobotu, 28. oktobra, we 18 hodž. na hudźbnym gospelowym nyšporje w Kulowskej cyrkwi zaklinčec. Swójski přinošk za dorosćenych wučinja 35 eurow, za šulerjow a studentow 10 eurow. Přizjewić móža so zajimcy hač do njedzele, 22. oktobra, z mailku na carmen.wutzler@gmx.de. Štóž ma prašenja, njech zazwoni na Jenny Pohl w Kulowje pod telefonowym čisłom (03 57 25) 9 25 41.